



廉吏傳目錄

宋

范質

曹彬

郭守文

袁繼忠

張鑄

沈倫

劉溫叟

賈黃中

呂端

雷有終

畢士安

王旦

曹修古

杜衍

范仲淹

石介

王質

包拯

胡宿

趙抃

彭思永

張載

畢仲游

劉恕

程珦

陳師道

柳植

朱震

張九成

高登

楊簡

朱熹

熊克

趙汝愚

牛大年

王萬

王阮

徐鹿卿

趙逢龍

程公許

陳宓

徐經孫

孫夢觀

徐僑

李韶

歐陽守道

楊文仲

陳蒙

常楙

趙宋仁厚開基諸儒輩出學術人品粹然一軌
 於正所稱廉者有剛直孤介而無奇詭谿刻之
 行如呂正惠范文正趙清獻表表人倫合之得
 四十九人

廉吏傳

宋

中范質

明武林黃汝亨輯

范質字文素大名宗城人仕周進位左僕射兼門下侍郎平章事宋初加兼侍中乾德初進封魯國公二年罷為太子太傅尋卒年五十四將終戒其子勿請謚勿刻墓碑太祖聞之為悲惋罷朝贈中

廉吏傳
書令質以廉介自持未嘗受四方饋遺前後所得
祿賜多給孤遺閨門之中食不異品身沒家無餘
貲太祖因論輔相謂侍臣曰朕聞范質止有居第
不事生產真宰相也太宗亦嘗稱之曰宰輔中能
循規矩慎名器持廉節無出質右者

遺戒勿請謚勿刻墓碑此范文素不可及與安
冀身後名者霄壤矣然質所以不請或自反移
禪時與陶穀共事邪此政不可及○今之子孫

不量動爲祖父乞謚而招訾議者當以此公爲
法

上曹彬

曹彬字國華正定靈壽人彬始生周歲父母以百玩之具羅于席觀其所取彬左手持干戈右手持俎豆斯須取一印他無所視人皆異之及長氣質淳厚乾祐中爲成德軍牙將周祖受禪召歸京師累擢河中都監蒲帥王仁鎬以彬帝戚尤加禮遇彬執禮益恭仁鎬謂從事曰老夫自謂夙夜匪懈及見監軍矜嚴始覺已之散率也顯德五年使吳

越致命訖，卽還私覲之禮，一無所受。吳越人以輕舟追遺之，至于數四，彬猶不受。旣而曰：吾終拒之，是近名也。遂受而籍之，以歸。悉上送官。世宗強還之，彬始拜賜，悉以分遺親舊，而不畱一錢。出爲晉州兵馬都監，遷引進使。建隆二年，自平陽歸，太祖召謂曰：我疇昔常欲親汝，汝何敢疎我。彬頓首謝曰：臣爲周室近親，復忝內職，靖共守位，猶懼獲過，安敢妄有交結。乾德初，爲左神武將軍，俄兼樞密。

承旨。二年冬，伐蜀，彬爲都監，申令戢下，所至悅服。西川平，王全斌等晝夜宴飲，不恤軍士，部下漁奪無已。蜀人構亂，彬復破平之。時諸將多取子女玉帛，彬橐中唯圖書衣衾而已。及還，上盡得其狀，以全斌等屬吏謂彬廉謹清介，授宣徽南院使，義成軍節度使。彬辭曰：西征將士俱得罪，臣獨受賞，恐無以示勸。六年，進檢校太傅。七年，伐江南，詔彬爲昇州西南路行營馬步軍戰擢都部署，自荆南順

流而東克池州八年進克潤州遂下金陵與諸將
約誓不妄僇一人及班師入見刺稱奉勅江南幹
事回其謙恭不伐如此尋拜樞密使太宗卽位加
同平章事三年進檢校太師從征太原加侍中尋
封魯國公雍熙三年與潘美等北伐失律軍敗責
授右驍衛上將軍四年仍爲侍中武寧軍節度使
徙平盧真宗立復檢校太師同平章事召拜樞密
使咸平二年被疾上臨問手爲和藥賜白金萬兩
薨年六十九上臨哭之慟言及彬必流涕贈中書
令追封濟陽郡王謚武惠與趙普配饗太祖廟庭
廉仁之將其居功退讓識量在寇萊公上

中郭守文

郭守文并州太原人。以內職總兵討平代州之叛。後護定州軍大破遼人于蒲城。復破夏州。降銀麟。寧定西鄙。功多。拜南院使。鎮州路都部署。又爲北面行營都部署。卒于官。旣喪月餘。中使自北邊來。言守文死。軍士皆流涕。帝問何以得此。對曰。守文得奉祿。賜賚悉犒勞士卒。死之日。家無餘財。帝嗟歎久之。賜其家錢五百萬。謚忠武。

中袁繼忠

袁繼忠其先振武人後徙并州開寶中平廣南繼忠爲先鋒後奉命擊梅山洞賊破之契丹犯代境繼忠擊走之前後賜賚鉅萬悉以犒士身歿之日家無餘財累官引進使護鎮定高陽關兩路屯兵淳化三年被命召還卒年五十五

郭袁俱得賞賜犒士

下張鑄

張鑄字司化河南洛陽人性清介不事生產舉進士歷起居郎金部員外郎明宗初轉金部郎中賜金紫累遷太常少卿及光祿卿皆避祖諱不拜改秘書監判光祿寺宋初加檢校刑部尚書建隆四年卒年七十三身無兼衣家人鬻其服馬園圃得錢十萬以葬

下沈倫

沈倫字順儀、開封太康人、少習三禮于嵩洛間、以講學自給、太祖領滑許宋三鎮、皆署倫從事、掌留後財貨以廉聞、及王師伐蜀、用爲隨軍水陸轉運使、先是王全斌崔彥進之入成都也、競取民家玉帛子女、倫獨居佛寺、飯蔬食、有以珍異奇巧物爲獻者、倫皆拒之、東歸篋中所有、纔圖書數卷而已、居第庫陋、處之晏如、累官工部尚書、以左僕射致

康史傳
仕年七十九卒贈侍中謚曰文
獨居佛寺飯蔬食

中劉溫叟

劉溫叟字永齡河南洛陽人建隆間拜御史中丞兼判吏部銓憲府舊例月賞公用茶中丞受錢一萬公用不足則以贓罰物充溫叟惡其名不取太宗在晉邸知其清介遣吏遺錢五百千溫叟受之貯廳西舍中令府吏封署而去明年重午又送角黍紈扇所遣吏卽送錢者視西舍封識宛然還以白太宗太宗曰我錢尚不用况他人乎昔日納之

廉吏傳
是不欲拒我也。今周歲不啓封，其苦節愈見。命吏輦歸邸。是秋，太宗侍宴後苑，因論當世名節士。具道溫叟前事。太祖再三賞歎，任臺丞。十二年，屢求代。太祖難其人，不允。開寶四年，被疾。太祖知其貧，就賜器幣。數月卒。年六十三。雍熙初，子炤罷徐州觀察推官待選，以貧詣登聞求注官。及引對，太宗問誰氏子。炤以溫叟對。太宗愀然，召宰相語其事。且言當今大臣罕有其比。因問炤當得何官。宰相言免選，以爲厚恩。帝曰：其父有清操，錄其子登朝，庶足示勸。遂擢炤太子右贊善大夫。
名節士○太宗信重錄其子亦自難得

下賈黃中

賈黃中、字媧民、滄州南皮人、唐相耽四世孫、六歲、舉童子科、七歲能屬文、觸類賦詠、父常令蔬食、曰、俟業成、乃得食肉、十五舉進士、後克江表、選知宣州、歲饑、民多爲盜、黃中出已奉造糜粥、賴全活者以千數、後知昇州、一日案行府署中、見一室扃鑰甚固、命發視之、得金寶數十櫃、計直數百萬、乃李氏宮閣中遺物也、卽表上之、上覽表、謂侍臣曰、非

廉吏傳
黃中廉恪則亾國之寶將汙法而害人矣賜錢三十萬淳化二年秋與李沆並拜給事中參知政事太宗召見其母王氏命坐謂曰教子如是真孟母矣作詩以賜之黃中畏慎過甚上謂侍臣曰朕嘗念黃中母有賢德七十餘年未覺老每與之言甚明敏黃中終日憂畏必先其母老矣至道初遘疾詔自澶州召還特拜禮部侍郎兼秘書監卒年五十六其母尚無恙卒如帝言贈禮部尚書上聞其素貧別賜錢三十萬既葬其母入謝又賜白金三百兩上謂之曰勿以諸孫爲念朕當不怠也

廉生于畏慎太宗知遇亦令人感嘆

上 呂端

呂端字易直、幽州安次人、少敏悟、好學、以蔭補千牛備身、歷官知成都府、爲政清簡、召拜考功員外郎、充開封府判官、坐事貶商州、累遷兼侍御史、知雜事、使高麗、暴風折檣、舟人怖恐、端讀書若在齋閣、遷諫議大夫、仍爲開封判官、時許王元僖尹開封、王薨、有發其陰事者、坐禪贊無狀、遣御史武元穎內侍王繼恩就鞫于府、端方決事、徐起候之、二

使曰有詔推君端神色自若顧從者曰取帽來二使曰何遽至此端曰天子有制問卽罪人矣遂下堂隨問而荅左遷衛尉少卿無何復舊官爲樞密直學士逾月拜參知政事時趙普在中書嘗曰吾觀呂公奏事得嘉賞未嘗喜遇抑挫未嘗懼亦不形于言真台輔器也尋擢戶部侍郎平章事初太宗欲相端或曰端爲人糊塗太宗曰端小事糊塗大事不糊塗遂決意相之猶恨任用之晚端爲相

持重識大體以與寇準同列已先居相位恐準不平乃請參知政事與宰相分日押班知印同升政事堂從之太宗崩李后與內侍王繼恩等謀立楚王元佐召端端知有變鎖繼恩于閣內使人守之而入乃奉太子至福寧庭中眞宗旣立垂簾引見羣臣端平立殿下不拜請捲簾升殿審視然後降階率羣臣拜呼萬歲眞宗每見輔臣入對惟于端肅然拱揖不名又以端體洪大庭階稍峻特令梓

人爲納。陞加右僕射。明年被疾，求免不許。車駕臨問，撫慰甚至。卒，年六十六。贈司空，謚正惠。端久居相位，不蓄貲產。卒後，子藩等貧匱，又迫婚嫁，因質其居第。真宗時，出內府錢五百萬贖還之，又別賜金帛，俾償宿負。

呂正惠神氣凝重，遇事識體，捲簾引視，擔荷大事，真大臣也。

中雷有終

雷有終字道成，同州郃縣人，德驤子也。以蔭補漢州司戶叅軍。太宗卽位，召爲大理寺丞，遷殿中丞，太常博士，少府少監，累官宣徽北院使，檢校太保。景德二年卒，年五十九。贈侍中。有終倜儻，自任不拘，小節有幹局，沈敏善斷，不畏強禦，輕財好施，歷典藩閫，能撫士卒，豐于宴犒，官用不足，則傾私帑。家無餘財，奉身甚薄，常所御者銅鞍勒馬而已。第

在崇仁里者、德驤所創、有終在蜀、嘗貸備用庫錢、數百萬、奏納其第償之、優詔蠲免、爲宣徽使、特給廉鎮公用錢歲二千貫、

好施寡取

中畢士安

畢士安字仁叟、代州雲中人事、繼母以孝聞、舉進士、累官吏部侍郎、叅知政事、與寇準同拜平章事、卒于位、年六十八、贈太傅、中書令、謚文簡、及王旦爲相、面奏曰、陛下前稱畢士安清慎如古人在位、聞之感嘆、仕至輔相、而四方無田園居第、歿未終喪、家用已屈、真不負陛下所知、然使其家假貸爲生、宜有以周之者、竊謂當出上恩、非臣敢爲私惠、

真宗感嘆賜白金五千兩

清慎如古人

上王旦

王旦字子明大名莘人太平興國五年進士及第爲大理評事知平江縣其廨舊有物恠憑戾居多不寧旦將至前夕守吏聞羣鬼嘯呼云相君至矣當避去自是遂絕咸平三年拜給事中同知樞密院事踰年以工部侍郎參知政事時契丹犯邊從幸澶州雍王元份畱守東京遇暴疾命旦馳還權畱守事旦奏曰十日之間未有捷音時當如何帝

默然良久曰立皇太子且既至京直入禁中下令甚嚴使人不得傳播及駕還且子弟及家人皆迎于郊忽聞後有騶訶聲驚視之乃且也二年加尚書左丞三年拜工部尚書同中書門下平章事集賢殿大學士監修兩朝國史大中祥符中累爲天書儀仗使大禮使尋拜司空且柄用十八年真宗久益信之凡大臣有所請必曰王且以爲如何天禧初進太保復加太尉兼侍中且力求避位帝親

其形瘁憫然許之以太尉領玉清昭應官使給宰相半俸且疾甚遣內侍問者日三四帝手自和藥賜之遺戒子弟我家盛名清德當務儉素保守門風勿爲厚葬以金寶置櫃中帝親視疾賜白金五千兩且作奏辭之藁末復益四句云益懼多藏况無所用見欲散施以息殃咎卽昇至內闈詔不許還至門且已薨年六十一帝臨其喪甚慟廢朝三日贈太師尚書令魏國公謚文正

文正相業多即畱守請奏語何等識力

下曹修古

曹修古字述之建州建安人進士起家累遷秘書丞歷殿中侍御史尚書刑部員外郎以言事忤劉太后黜知興化軍會赦復官卒修古立朝慷慨有風節既歿人多惜之家貧不能歸葬賓佐賻錢五十萬季女泣白其母曰奈何以是累吾先人也卒拒不納

女不受賻最奇以此見修古

上杜衍

杜衍字世昌、越州山陰人、擢進士甲科、累官同平章事、集賢殿大學士、兼樞密使、衍好薦引賢士、而沮止僥倖、小人多不悅、爲言官所奏、以尚書左丞出知兗州、慶曆七年、衍甫七十、上表請老、乃以太子少師致仕、皇祐元年、特遷太子太保、召陪祀明堂、仍詔應天府敦遣就道、都亭驛設帳具几杖以待、稱疾固辭、進太子太傅、又進太子太師、封祁國

公。衍。清。介。不。殖。私。產。既。退。寓。南。都。凡。十。年。第。室。卑。陋。才。數。十。楹。居。之。裕。如。也。出。入。從。者。十。許。人。烏。帽。皂。綈。袍。革。帶。或。勸。衍。爲。居。士。服。衍。曰。老。而。謝。事。尚。可。竊。高。名。邪。善。爲。詩。正。書。行。草。皆。有。法。病。革。帝。遣。中。使。賜。藥。挾。太。醫。往。視。不。及。卒。年。八。十。贈。司。徒。兼。侍。中。謚。曰。正。獻。臨。歿。戒。其。子。忠。孝。歛。以。一。枕。一。蓆。小。壙。厚。冢。以。葬。進。務。薦。士。退。不。近。名。

上范仲淹

范仲淹字希文。蘇州吳縣人。二歲而孤。母更適長山朱氏。仲淹少有志操。既長。知其世家。乃感泣辭母去。之南都。學舍晝夜講誦。冬月。憊甚。以水沃面。食不給。至以糜粥繼之。居六年。大通六經之旨。爲文章論說。必本于仁義。祥符八年。舉進士第。爲廣德司理參軍。迎其母歸。養。遷監楚州糧料院。母喪去。天聖中。晏殊知應天府。薦爲秘閣校理。學者多

從之。仲淹嘗推其奉以食四方遊士。諸子至，易衣而出。每感激論天下事，奮不顧身。一時士大夫矯厲風節，自仲淹倡之。歷官參知政事，以天下爲己任。嘗言：士當先天下之憂而憂，後天下之樂而樂。後爲小人所攻，自請罷政，乃以爲資政殿學士。陝西四路宣撫使，知邠州。是時夏人已請臣，仲淹因以疾請鄧州，再徙杭州，遷戶部侍郎，徙青州。會病甚，請潁州，未至而卒。年六十四。贈兵部尚書，謚文

正。仲淹內剛外和，性至孝。以母在時方貧，其後雖貴，非賓客不重肉。妻子衣食僅能自充，而好施予。置義莊里中，以贍族。人士多出其門，下里巷之人皆能道其名字。歿之日，四方聞者皆爲嘆息。初爲環慶路經略安撫，招討使，務持重，不急近功小利。所在賊不敢犯。邠慶二州之人與屬羗皆畫像立生祠，事之。及其卒也，哭之如父。

文正先憂濟世，其本色也。至今義莊義倉皆祖

之

下石介

石介字守道、兗州奉符人、進士及第、篤學有志尚、樂善疾惡、喜聲名、遇事奮然、敢爲御史臺辟爲主簿、未至、卽上書言事、罷爲嘉州軍事判官、丁父母憂、耕徂徠山下、葬五世之未葬者七十喪、以易教授于家、魯人號徂徠先生、入爲國子監直講、學者從之甚衆、太學由此益盛、介爲文有氣、嘗著唐鑑以戒奸臣宦官宮女、杜衍韓琦薦直集賢院、會呂

夷簡罷相夏竦既除樞密使復奪之以衍代而范仲淹及琦等同時執政歐陽修等爲諫官介喜曰此盛事也歌頌吾職其可已乎作慶曆聖德詩詩且出孫復曰子禍始于此矣介不自安求出通判濮州未赴卒會徐狂人孔直溫反搜得介書夏竦銜介甚且欲中傷琦等因言介詐死北走契丹請發棺以驗掌書記龔鼎臣提點刑獄呂居簡等力保介已死得免斲棺介家貧甚妻子幾凍餒富弼

韓琦共分奉買田以贍養之有祖徠集行于世

介有氣能文人也顧作慶曆聖德詩累韓范諸公幾不自保骸骨喜聲名爲患如此戒之戒之

下王質

王質字子野，且之從子。單州單父人，以蔭補太常奉禮郎，試進士及第。質家世富貴，兄弟習爲驕侈，而質自奉簡素，如寒士，不喜畜財，至不能自給。初且爲中書舍人，家貧，與昆弟貸人息錢，違期以所乘馬償之。質閱書得故券，召子弟示之，曰：「此吾家素風，爾曹當毋忘也。」後范仲淹貶饒州，治朋黨方急，質獨載酒往餞。或以誚質，質曰：「范公賢者，得爲。」

之黨幸矣。後以天章閣待制出知陝州卒。
處侈能約載酒餞范是立節之士

上包拯

包拯字希仁廬州合肥人也舉進士除大理評事
調知天長縣有盜割人牛舌者主來訴拯曰第歸
殺而鬻之尋復有來告私殺牛者拯曰何爲割牛
舌而又告之盜驚服徙知端州端土產硯前守緣
貢率取數十倍以遺權貴拯命製者才足貢數歲
滿不持一硯歸累遷三司戶部副使除龍圖閣直
學士河北都轉運使後知開封府遷右司郎中拯

立朝剛毅貴戚宦官爲之斂手人以其笑比黃河
清累遷給事中樞密副使頃之遷禮部侍郎辭不
受尋以疾卒年六十四贈禮部尚書謚孝肅拯性
峭直與人不苟合平居無私書故人親黨皆絕之
雖貴衣服器用飲食如布衣時嘗曰後世子孫仕
宦有犯贓者不得放歸本家死不得葬大塋中不
從吾志非吾子若孫也

剛○鈎致割牛舌者亦巧

上胡宿

胡宿字武平常州晉陵人登第爲揚子尉縣大水
民被溺令不能救宿率公私船活數千人以薦爲
館閣校勘後知湖州築石塘百里捍水患大興學
校學者盛于東南自宿始母憂去官州人思之名
其塘曰胡公塘學者爲立生祠歷官樞密副使數
以老乞身治平三年罷爲觀文殿學士知杭州爲
政不略細故民尤愛之明年以太子少師致仕而

薨年七十二。贈太子太傅。謚曰文恭。宿爲人清謹。少與一僧善。僧有秘術。能化瓦石爲黃金。且歿以授宿。使葬之。宿曰。後事當盡力。他非吾所冀也。僧歎曰。子之志未可量也。其篤行自勵。至于貴顯。常如布衣時。其學該博。兼通陰陽五行。天人災異之說。有文集四十卷。

士大夫不得志。往往事燒煉。貪心不斷也。胡公可法。

上趙抃

趙抃字閱道。衢州西安人。進士及第。曾公亮薦爲殿中侍御史。彈劾不避權倖。聲稱凜然。京師目爲鐵面御史。其言務欲朝廷別白。君子小人。遷爲右司諫。出知虔州。嶺外仕者。歿多無以爲歸。抃造舟百艘。移告諸郡曰。仕宦之家。有不能歸者。皆于我乎。出於是。至者相繼。悉授以舟。并給其道里費。召爲侍御史。進天章閣待制。河北都轉運使。時賈昌

朝以故相守魏、抃將按視府庫，昌朝使來告曰：「前此監司未有按視吾藏者，恐事無比。」抃曰：「舍是則他郡不服，竟往焉。」神宗立，召知諫院及謝，帝曰：「聞卿匹馬入蜀，以一琴一鶴自隨，爲政簡易，亦稱是乎。」未幾，擢叅知政事。王安石用事，抃屢斥其不便，懇乞去位，拜資政殿學士，知杭州，改青州。時京東旱蝗，蝗及青境，遇風退飛，盡墮水，死。歷知成都、越州，復徙杭，以太子少保致仕，而官其子玘。提舉兩浙常平，以便養。玘奉抃遍遊諸名山，吳人以其爲榮。元豐七年薨，年七十七，贈太子少師，謚曰清獻。抃長厚，清修，人不見其喜愠。平生不治貨業，日所爲事，入夜必衣冠露香，以告于天，不可告則不敢爲也。

清獻琴鶴孤標，至造百艘，給嶺外旅櫬，致仕歸。與子遍遊諸名山，不專以清峻勝。

下彭思永

彭思永字季長廬陵人第進士歷官知太平州熙寧三年以戶部侍郎致仕卒年七十一思永仁厚廉恕爲兒時旦起就學得金釵于門外默坐其處須臾亾釵者來物色審之良是卽付之其人欲謝以錢思永笑曰使我欲之則匿金矣始就舉持數釧爲資同舉者過之出而玩或墜其一于袖間衆相爲求索思永曰數止此耳客去舉手揖釧墜于

地衆皆服其量居母喪窶甚鄉人饋之無所受。還金釵易事第兒時難耳墜釧不索却是量○思未爲御史中丞時爲蔣之奇所誤誣蔑歐陽修是識闇

上張載

張載字子厚長安人少喜談兵至欲結客取洮西之地年二十一以書謁范仲淹一見知其遠器乃警之曰儒者自有名教可樂何事于兵因勸讀中庸猶以爲未足也又訪諸釋老無所得反而求之六經舉進士爲雲巘令熙寧初御史中丞呂公著薦之于朝召問治道對曰爲治不法三代終苟道也帝悅以爲崇文院校書俄移疾屏居南山下終

廉吏傳
目危坐一室、左右簡編、俯而讀、仰而思、敝衣蔬食、與諸生講學、學者有問、多告以知禮成性、變化氣質之道、呂大防薦之、召知太常禮院、與有司議禮、不合、復以疾歸、中道疾甚、沐浴更衣而寢、旦而卒、年五十八、貧無以斂門人買棺、奉其喪還、載學古力行爲關中士人宗師、世稱爲橫渠先生。

學本六經治法三代、豈有合乎宐其貧宐其廉

下畢仲游

畢仲游字公叔、士安曾孫、與兄仲衍同登第、仲游爲開封府推官、出提點河東路刑獄、太原銅器名天下、獨不市一物、懼人以爲矯也、且行買二茶七、而去、韓縝曰、如公叔可謂真清矣、仲游蚤受知于司馬光、呂公著、不及用、范純仁尤知之、當國時、又適居母喪、故未嘗得尺寸進、然亦墮黨籍、坎壈散秩而終、卒年七十五。

買茶七亦復不必

中劉恕

劉恕字道源、渙子也、筠州人、少穎悟、書過目即成、誦年十三、欲應制舉、從人假漢唐書、閱月皆歸之、未冠舉進士、賜第、與司馬光共修資治通鑑、考證差謬最爲精詳、王安石與之有舊、欲引寘三司條例、司恕以不習金穀爲辭、安石怒、與之絕、出監南康軍酒稅、官至秘書丞、卒年四十七、恕爲學自曆數、地理、官職、族姓、至前代公府案牘、皆取以審證、

求書不遠數百里身就之讀且抄殆忘寢食宋次道知亳州家多書恕枉道借覽次道日具饌爲主人禮恕曰此非吾所爲來也殊廢吾事悉去之獨閉閣晝夜口誦手抄畱旬日盡其書而去目爲之翳家素貧無以給甘旨一毫不妄取于人自洛南歸時方冬無寒具司馬光遺以衣襪及故茵褥辭不獲強受而別行及頽悉封還之

父渙高隱廬山三十餘年此稱渙兒

中程珣

程珣世居中山後從開封徙河南爲黃陂尉後知龔州時宜獠區希範旣誅鄉人忽傳其神降言當爲我立祠於是迎其神以往至龔珣使人詰之荅曰比過潯潯守以爲妖投祠具江中逆流而上守懼乃更致禮珣使復投之順流去其妄乃息徙知磁州又徙漢州抗議言新法不便使者李元瑜怒卽致仕累轉太中大夫元祐五年卒年八十五珣

慈恕而剛斷。平居與幼賤處，惟恐有傷其意。至於犯禮義，則不假也。左右使令之人，無日不察其饑飽寒燠，前後五得任子，以均諸父之子孫。嫁遣孤女，必盡其力所得奉祿，分贍親戚之貧者。伯母寡居，奉養甚至。從兄女既適人而喪其夫，珣迎以歸，教養其子，均於子姪。官小祿薄，克已爲義人，以爲難。文彥博等九人表其清節，詔賜帛二百，官給其葬。子顥爲宋名儒。

下陳師道

陳師道字履常，一字無已，彭城人。好學苦志，年十六以文謁曾鞏，鞏一見竒之，許以文著。熙寧中，王氏經學盛行，師道心非其說，遂絕意進取。元祐初，蘇軾薦其文行，起爲徐州教授，又爲太學博士，改教授潁州，調彭澤令，不赴。家素貧，或經日不炊，妻子慍見，宴如也。久之，召爲秘書省正字，適預郊祀行禮，寒甚，衣無綿，妻就假于其友趙挺之家，問所。

康。吏。傳。從。得。不。肯。服。遂。以。寒。疾。卒。年。四。十。九。友。人。鄒。浩。買。棺。斂。之。

枯寒

下柳植

柳植字子春、真州人、舉進士、歷知壽、亳、蔡、揚四州、分司西京、累遷吏部侍郎、卒、所至官舍、蔬菓不輒採、家無長物、時稱其廉。

中朱震

朱震字子發、荆門軍人、登政和進士第、仕州縣、以廉稱、趙鼎參知政事、上諮以當世人才、鼎曰、臣所知、朱震學術深博、廉正守道、士之冠冕、轉給事中、遷翰林學士、時處州民為盜、天子以為憂、選良大守往慰撫之、將行、震曰、使居官者廉而不擾、則百姓自安、雖誘之為盜亦不為矣、願詔新太守到官之日、條具本郡及屬縣官吏有貪墨無狀者、一切

罷去。聽其自擇慈祥仁惠之人。有治效者。優加獎勸。上從其言。累遷中書舍人。後謝病乞祠。旋知禮部貢舉。會疾卒。

上張九成

張九成字子韶。別號無垢居士。其先開封人。徙居錢塘。十四游郡庠。閉閣終日。比舍生穴隙視之。則歛膝危坐。對置大編。若與神明伍。乃相驚服。而師尊之。游京師。從楊時學。權貴托人致幣曰。肯從吾游。當薦之館閣。九成笑曰。王良且羞與嬖奚乘。吾可爲貴游客邪。紹興二年。上策進士。九成射策。至晡未畢。貂璫促之。九成曰。未也。方談及公等。上覽

其對擢置第一授鎮東僉判未幾投檄歸九成旣
歸學者日衆九成嘗言耳目乃禮樂之原夢寐乃
居處之驗趙鼎薦于朝遂以太常博士召遷著作
郎上言我宋家法曰仁而已除浙東提刑力辭與
祠以歸未幾復除宗正少卿兼權刑部侍郎忤秦
檜意謫守邵州再謫南安軍九成在南安十四年
又自號橫浦居士每執書就明倚立庭磚歲久雙
趺隱然廣帥致贏金九成曰吾何敢苟取悉歸之

檜歿起知溫州尋丐祠歸數月病卒寶慶初特贈
太師封崇國公謚文忠

子韶深於道者辭貴游忤權姦其餘事

中高登

高登字彥先、漳浦人。紹興二年，廷對極意盡言，無所顧避。有司惡其直，授富川主簿。滿秩，士民丐留，不獲。相率饋金五十萬，不告姓名。白於守曰：「高君貧無以養，願太守勸其咸受。」登辭之，不可。復無所歸，請置於學，買書以謝士民。還上疏，秦檜惡其譏已，授古縣令。尋取旨，編管容州。登謫居，授徒以給家事。一不介意。惟聞朝廷事，小失則顰蹙，大失則

康史傳
四十三
慟哭隨之。臨卒所言皆天下大計也。

如此忠憤人焉能取容。○置金買書清奇。

中楊簡

楊簡字敬仲，慈溪人。乾道五年舉進士，歷授著作郎，將作少監，入對，荅必徃復，漏過八刻，上目送久之。兼國史院編修官，以面所陳未行，求外補。知溫州，廉儉自將，奉養菲薄。常曰：吾敢以赤子膏血自肥乎？民愛之如父母，咸畫象事之。遷駕部員外郎，老稚扶擁，緣道傾城哭送。官至寶謨閣學士、太中大夫，卒，贈正奉大夫。

楊敬仲精于易詳著已易論學者稱爲慈湖先生

上朱熹

朱熹字元晦一字仲晦世徽州婺源人父松以不
附和議去國入閩熹幼穎悟中紹興十八年進士
第孝宗卽位上封事乾道三年陳俊卿薦爲樞密
院編修官不起上曰熹安貧樂道廉退可嘉特改
主管台州崇道觀再辭淳熙二年除秘書郎辭主
管武夷山冲佑觀五年知南康軍時浙東大饑易
提舉浙東常平茶鹽事卽日單車就道拊問存卹

所活不可數紀。九年，以賑濟有功，進直徽猷閣，辭。知台州十年，差主管台州崇道觀，學者益衆。十四年，除提點江西刑獄公事。十五年，王淮罷相，遂力疾入奏，除兵部郎，辭。主管嵩山崇福宮，具封事投匭以進，凡幾千言，疏入，上已就寢，亟起秉燭讀之。終篇，明日，除主管太一宮，兼崇政殿說書，熹力辭。除秘閣修撰，奉外祠。光宗卽位，除江東轉運副使。改知漳州。紹熙二年，除荆南路轉運副使。寧宗立，

首召奏事，兼實錄院同修撰。慶元二年，丞相趙汝愚罷，韓侂胄誣熹不軌，謫永州。二年，監察御史沈繼祖誣熹十罪，詔落職罷祠。五年，卒。年七十一。疾且革，手書屬其子及門人拳拳勉學，及修正遺書爲言。翌日，正坐，整衣冠，就枕而逝。熹登第五十年，仕于外者，僅九考，立朝纔四十日。家故貧，少依父友劉子羽，寓建之崇安，後徙建陽之考亭，簞瓢屢空，宴如也。諸生之自遠至者，豆飯藜羹，率與之共。

往。往。稱。貸。于。人。以。自。給。而。非。其。道。義。則。一。介。不。取。也。嘉泰初、詔賜熹恩澤、謚曰文、贈寶謨閣直學士、安貧樂道、立朝纔四十日、出處生歿之際、粹然儒者、不爲廉名也。

下熊克

熊克字子復、建寧建陽人、紹興中、中進士第、知諸暨縣、入爲提轄、文思院、孝宗喜其文、特出御筆、除直學士院、歷起居郎、兼直學士院、出知台州、奉祠、克博聞強記、著述外、無他嗜、家素儉約、雖貴不改。舊所居卑陋、門不容轍、雖部使者郡守至、必降車、乃入、嘗愛臨川童子王克勤之才、將妻以女、而乏資、遣會草制、獲金、遂以歸之、人稱其清介、卒年七

上趙汝愚

趙汝愚字子直，餘干人也。擢進士第，召試館職，歷遷右丞相樞密使，立朝審正，忤韓侂胄，爲其黨李沐所誣。汝愚出浙江亭待罪，遂罷右相，除觀文殿學士，知福州臺，臣合詞乞寢，出守之命，遂以大學士提舉洞霄宮。朝臣不平，爭上書訟汝愚之忠，侂胄忌益深，遂以中丞何澹疏落大觀文，御史胡紘疏責寧遠軍節度副使，永州安置。汝愚夷然就道。

慶元二年、至衡州、病作、爲守臣錢鏊所窘、暴薨、天下聞而寃之、汝愚學務有用、常以司馬光富弼韓琦范仲淹自期、聚族而居、門內三千指、所得稟給、悉分與之、菜羹蔬食、恩意均洽、自奉養甚薄、爲侍郎時、大冬衣布裘、至爲相亦然、侂冑誅、盡復原官、謚忠定、贈太師、封沂國公、

下牛大年

牛大年、字隆叟、揚州人、慶元二年、進士、歷官將作監主簿、入對、請懲貪吏、累遷、崇政殿說書、以寶章閣待制、提舉太平興國宮、卒、特贈四官、大年清操凜然、所至以廉潔自將、

中王萬

王萬字處一家世婺州登嘉定十六年進士第知
台州終日坐廳事事至立斷吏無所售徃徃改業
散去食惟蔬飯後爲監察御史首論史嵩之貪穢
無大臣節後乞休致詔特轉朝奉郎守太常少卿
致仕卒嵩之罷相衆方交論其非上思萬先見親
賜御札謂萬立朝蹇諤古之遺直爲郡廉平古之
遺愛聞其母老家貧朕甚念之賜新會五千貫田

五百畝以贍給其家

遺直遺愛可傳

中王阮

王阮字南卿江州人舉進士爲南康都昌主簿以廉聞韓侂胄宿聞阮名特命入奏將誘以美官夜遣密客詣阮阮不荅私謂所親曰吾聞公卿擇士士亦擇公卿劉歆柳宗元失身匪人爲萬世笑今政自韓氏出吾肯出其門邪陛對畢拂衣出關歸隱廬山朱熹常惜其才氣術略過人而畱滯不偶嘉定元年卒

中徐鹿卿

徐鹿卿字德夫隆興豐城人嘉定十六年廷試進士第居二詳定官以其直抑之猶寘第十調南安軍學教授累官禮部侍郎累疏告老授寶章閣待制知寧國府而引年之疏五上不允提舉鴻禧觀遂致仕進華文閣待制卒謚清正鹿卿居家孝友居官廉約清峻毫髮不妄取一廬僅庇風雨所著有泉谷文集奏議講義鹽楮議政藁歷官對越集

手編漢唐文類文苑菁華

中趙逢龍

趙逢龍字應甫慶元之鄞人登嘉定十六年進士
居官自常奉外一介不取民賦有逋負悉爲代輸
遷將作監拜宗正少卿兼侍講年八十有八終于
家逢龍家居講道從遊者皆鉅公名士丞相葉夢
鼎出判慶元修弟子禮常謂師門庠陋欲市其隣
居充拓之逢龍曰隣里粗安一旦驚擾彼雖勉從
我能無愧於心逢龍寡嗜慾不好名敷歷日久而泊

然不知富貴之味。或問何以裕後，逢龍笑曰：吾憂子孫學行不進，不患其饑寒也。

下程公許

程公許字季與，敘州宣化人。嘉定四年，舉進士，通判簡州。改隆州。未上，會金人犯閬中，辟公許通判施州。諸將乘亂抄劫，事定自危，大將和彥威懷金寶以獻公許。正色卻之。彥威慚而退。公許冲澹寡欲，晚年惟一僮侍食，無重味。一裘至十數年，不易。家無羨儲，累官權刑部尚書，卒，贈宣奉大夫，不易裘慕劾晏嬰。

中陳宓

陳宓字師復、丞相俊卿之子、以父任歷知南康軍、
遷南劍州、皆有惠政、後改知漳州、未行、聞寧宗崩、
嗚咽累日、遂致仕、尋卒、自言居官必如顏真卿、居
家必如陶淵明、而深愛諸葛亮身、死家無餘財、庫
無餘帛、庶乎能蹈其語者、端平初、詔贈直龍圖閣、
顏陶諸葛雅志希踪

下徐經孫

徐經孫字中立寶慶二年進士授瀏陽主簿潭守
俾部牙契錢至州有告者曰朝廷方下令頒行十
七界會令若此錢皆用會小須則幸而獲大利矣
經孫曰此錢取諸保司出諸公庫吾納會而私取
其錢外欺其民內欺其心奚可哉詰旦悉以所部
錢上之其人驚服累官端明殿大學士卒贈金紫
光祿大夫

中孫夢觀

孫夢觀字守叔慶元府慈溪人寶慶二年進士歷
遷知寧國府丞相董槐召還帝問江東廉吏首以
夢觀對帝悅遷司農少卿兼資善堂贊讀後權吏
部侍郎力求補外以集英殿修撰知建寧府郡人
徐清叟以爲有古循吏風民有夢從者甚都迎祠
山神出視之則夢觀也俄而夢觀得疾口授遺表
不怠規諫遂卒帝悼惜久之賻銀帛三百其居敗

屋數間。布衣蔬食而已。

中徐僑

徐僑字崇甫婺州義烏人。淳熙十四年舉進士。端平初遷秘書少監。太常少卿。入覲。手疏數千言。帝見其衣履垢敝。愀然謂曰。卿可謂清貧。僑對曰。臣不貧。陛下乃貧耳。帝曰。朕何爲貧。僑曰。陛下國本未建。疆宇日蹙。權幸用事。將帥非材。旱蝗相仍。盜賊並起。經用無藝。帑藏空虛。民困於橫斂。軍怨於倍克。羣臣養交。而天子孤立。國勢帖危。而陛下不

廉吏傳
卷之八
五十七
悟。臣不貧。陛下乃貧耳。帝爲之感動，賜僑金帛，固辭不受。官至侍講，以疾求解職，乃以寶謨閣待制奉祠卒，謚文清。

下李韶

李韶字元善，彌遜之曾孫也。嘉定四年，與兄寧同舉進士，調南雄州教授，以廉勤薦，累遷殿中侍御史，乞補外，以集賢殿修撰知漳州，號稱廉平。嘉熙五年，召爲禮部侍郎，至闕，屢上書言時事，是時杜範亦在列，二人廉直，中外稱爲李杜。累官翰林學士，兼知制誥。淳祐七年，旬去，乃以端明殿學士提舉玉隆宮。十一年卒，年七十五。韶簡澹，不溺於聲。

色。貨。利。默。坐。一。室。門。無。雜。賓。

下歐陽守道

歐陽守道字公權吉州人淳祐元年舉進士授雲
都主簿後遷秘書郎以言事罷官徒步出錢塘門
惟書兩篋而已後遷著作郎卒家無一錢

中楊文仲

楊文仲字時發眉州彭山人以春秋貢後胄試功
試皆第一累遷國子博士旬外添差通判台州故
事守貳尚華侈正月望取燈民間吏以白文仲曰
爲吾然一燈足矣劭農東郊守因欲泛湖文仲卽
先馳歸添差通判揚州牙契舊額歲爲錢四萬緡
累改增至十六萬開告訐以求羨文仲曰希賞以
擾民吾不爲也嘗言與民之惠有限不擾之惠無

窮累官給事中國子祭酒及元兵渡江畿甸震動朝士多棄去者侍從班唯文仲一人而已尋以疾改集英殿修撰知泉州因將家踰嶺南待次而卒文仲侍班不去標歲寒之節

下陳蒙

陳蒙慶元府鄞人年十八上書萬言除太府寺主簿入對極言賈似道之奸似道銜之誣以貪污貶建昌軍簿錄其家惟有青氈一片德祐初以刑部侍郎召不赴卒

中常楸

常楸字長孺，顯謨閣直學士。同之曾孫。淳祐七年，舉進士，調常熟尉。公廉自持，不畏彊禦。部府交薦之。後監江淮茶鹽所，蕪湖局不受商稅贏。知廣德軍，郡有水災，發社倉粟以活饑民。官吏難之，楸先發而後請，專命之罪。故事，郡守秋苗例可得米千石，楸以代屬縣償大農綱欠。知平江，值旱，故事應得紙錢十五萬，悉以助民食。軍餉請蠲苗九萬稅。

十三萬版帳十六萬又蠲新苗二萬八千大寬公私之力飛蝗幾及境疾風飄入太湖旣代有送還事例自給吏卒外餘金萬楮楸悉不受吏嘆曰常侍郎真不愛錢德祐二年拜參知政事後六年卒





